


# SI JESUS ANG ILAW NG SANLIBUTAN



## Sa Araling Ito'y Pag-aaralan Mo

Ilaw para sa Sanlibutan  
Kadiliman ng Sanlibutan  
Ilaw ng Diyos

Likas ng Ilaw  
Ang Ilaw ay nagtataboy ng kadiliman  
Ang Ilaw ay naghahayag  
Ang Ilaw ay lakas  
Ang Ilaw ay walang pinipili

Pagtugon sa Ilaw  
Pagtanggi  
Pagtanggap

## Ilaw Para sa Sanlibutan

### Kadiliman ng sanlibutan

Naglakad ka na ba sa dilim at umasam na sana'y may ilaw upang makakita ka? Hindi mo alam ang mga panganib sa magkabikabila, o sa unahan. Ni hindi mo tiyak kung tamang landas ang tinatahak mo. Napakadaling mali-gaw kapag nasa dilim.

O kaya'y napalipas mo ang magdamag na may-kinatatakutan kang panganib, alam o di-alam. Ibang-iba na ang paligid kinabukasan nang magliwanag at sumikat ang araw! Madali mong mauunawaan kung bakit ginagamit ng Biblia ang kadiliman bilang sagisag ng kasamaan, kamalian, kawalang-katiyakan, suliranin, at kamatayan. Ang ilaw ay isang sagisag ng buhay, galak, katotohanan, at lahat ng kabutih-an.

Ang kadiliman ay pagkawala ng ilaw. Nilamon ng espirituwal na kadiliman ang sanlibutan mula nang mahiwalay sa Diyos sina Adan at Eba dahil sa kasalanan. Bakit? Sapagkat ang Diyos ang pinagmumulan ng ilaw. Pagwala siya, lalaboy tayo sa dilim — naligaw, hindi alam ang pupuntahan. Inilalarawan ng Biblia ang ganitong kalagayan:

**Isaias 59:2,9,10.** Pinapaghiwalay ng inyong mga kasamaan kayo at ang inyong Diyos, at ang inyong mga kasalanan ay siyang nagpakubli ng kanyang mukha sa inyo, kaya't ang kahatulan ay malayo sa amin, o umaabot man sa amin ang katuwiran: kami'y nagsisihanap ng liwanag, ngunit narito, kadiliman; ng kaliwanagan, ngunit nagsisilakad kami sa kadiliman. Kami'y nagsisikapa sa bakod na parang bulag, oo, kami'y nagsisikapa na gava nila na walang mga mata.

Efeso 4:18. Wala silang pang-unawa.

I Juan 2:11. Ang napopoot sa kanyang kapatid ay nasa kadiliman pa: lumalakad siya sa kadiliman at hindi nalalaman ang kanyang patutunguhan, sapagkat binulag ng kadiliman.

### Ang Gagawin Mo

1. Ano ang kadiliman?
  - .... a) Isang kapangyarihan
  - .... b) Kawalan ng ilaw
  - .... k) Kalabuan ng mata.
  
2. Ano ang pinagmulan ng kadilimang espirituwal sa sanlibutan?
  - .... a) Kapalaran
  - .... b) Kawalan ng espirituwal na ilaw
  - .... k) Kasalanan ang naghiwalay sa tao mula sa Diyos
  
3. Ilista ang sumusunod sa ilalim ng tamang panig: buhay, kamatayan, galak, mabuti, kasamaan, pag-ibig, poot, kamalian, katotohanan.

Kadiliman

Kaliwanagan

.....

.....

.....

## Ilaw ng Diyos

Ang Diyos ay ilaw — pinagmumulan ng lahat ng liwanag. Nasa kadilimang espirituwal ang mga tao malibang tumanggap sila ng tanging kapahayagan ng ilaw ng Diyos. Kaya nga napa-rito si Jesus at naging Ilaw ng Sanlibutan: Siya'y dumating upang ibigay sa atin ang Ilaw ng Diyos upang ihayag sa atin ang pag-ibig at kalooban ng Diyos para sa atin.

**1 Juan 1:5.** Ang Diyos ay ilaw, at walang anumang kadiliman sa kanya.

**Juan 1:4.** Mula sa kanya ang buhay at ang buhay ang siyang ilaw ng sangkatauhan.

Sabi ni Jesus tungkol sa kanyang sarili:



**Juan 8:12.** Ako ang ilaw ng sanlibutan. Ang sumusunod sa akin ay magkakaroon ng ilaw na nagbibigay-buhay, at di na lalakad sa kadiliman.”

**Juan 9:5.** “Habang ako’y nasa sanlibutan, ako ang ilaw ng sanlibutan.”

Hindi dapat ipagtaka ng mga tao r.a mapakinggang tinukoy ni Jesus na Siya ang ilaw ng sanlibutan. Hinulaan ni propeta Isaias na darating ang Mesias bilang Ilaw ng Diyos. Binanggit ni Mateo ang hulang ito sa Matandang Tipan at sinabing naganap kay Jesus:

**Mateo 4:16.** Itong bayang nag-apuhap sa gitna ng kadiliman sa wakas ay nakakita ng maningning niyang ilaw. Liwanag na taglay nito’y siya ngayong tumatanglaw sa lahat ng nalugami sa lilim ng kamatayan!

### Ang Gagawin Mo

4. Anong talata ang nagsasabing ang Diyos ay ilaw? . . . . .  
Isaulo mo ito.
5. Sino ang nagsabi, "Ako ang ilaw ng sanlibutan? . . . . .
6. Isaulo ang Juan 8:12, Ano ang sinabi ni Jesus na kakamtan natin kung tayo'y susunod sa kanya?

### Likas ng Ilaw

#### Ang Ilaw ay Nagtatatoboy sa kadiliman

Si Jesus, ang ilaw, ay nagtatatoboy sa kadiliman. Ang presencia Niya sa puso ang nagtatatoboy ng kasalanan, kasamaan, takot, at poot. Ang Kanyang ilaw ay naghahatid ng pag-asa katiyakan, kaaliwan, at kalakasan sa kaluluwa.

**Awit 27:1.** Ang Panginoon ay aking liwanag, at aking kaligtasan: kanino ako mata-takot? Ang Panginoon ay katibayan ng aking buhay: kanino ako masisindak?





Makapangyarihan ang ilaw kay-sa kadiliman. “Lahat man ng kadiliman sa sanlibutan ay di makapapatay sa ilaw ng isang kandila.” Kung si Jesus ay nasa iyo, ang kapangyarihan ng kasamaan sa paligid, at ang madidilim na karanasan ng buhay ay hindi makatatakip sa Kanyang ilaw. Isang babaing Cristiano ang matalagal nang maysakit at di makabangon gayunma’y lagi siyang masayahin. Nang tanungin kung paano siya nagiging masaya gayong di man makalabas upang masdan ang araw, ganito ang sagot niya. “Madilim ang aking silid nguni’t ang Anak ng Diyos ay nasa puso ko” Si Jesus ang pinagmumulan ng panloob niyang ilaw na nagtataboy sa kalungkutan. Binabaha Niya ang kanyang kaluluwa sa liwanag ng araw.

**Juan 1:5.** Nagliliwanag sa kadiliman ang ilaw, at hindi ito kailanman nagapi ng kadiliman.

**Mikas 7:8.** Pagka ako’y naupo sa kadiliman, ang Panginoon ang magiging ilaw sa akin.

### Ang Gagawin Mo

7. Ano ang magtataboy sa takot, kasamaan, kasalanan, poot, pagdarandam sa puso ng tao?
  - .... a) mag-isip ng positibo
  - .... b) sundin ang tuntunin sa wastong pag-iisip
  - .... k) ang pananahanan ni Jesus sa buhay
8. *Isipin mo:* Kailangan mo ba si Jesus upang itaboy ang anumang kadiliman sa iyong buhay? Mayroon ka bang panloob na ilaw na nagliliwanag kahit may paghihirap o suliranin kang dinaranas?

**Ang Ilaw ay naghahayag**

Dahil sa ilaw, nakikita natin ang mga bagay. Ang tanging paraan upang ating maalaman ang espirituwal na katotohanan ay sa pamamagitan ng espirituwal



na ilaw na nanggagaling sa Diyos. Matatagpuan natin ang ilaw na ito sa Salita ng Diyos — ang Biblia at sa buhay na Salita ng Diyos — si Jesu-Cristo. Si Jesus ang naghahayag at nagbibigay-kahulugan sa buhay. Tinutulungan Niya tayong maunawaan ang Salita ng Diyos at ipinakikita sa atin ang daan tungo sa Diyos. Siya mismo ang daan.

**Juan 14:6.** Sumagot si Jesus. “Ako ang daan, ang katotohanan, at ang buhay. Walang makapupunta sa Ama kundi sa pamamagitan ko.”

Tinutulungan tayo ni Jesus na makita ang tunay nating katayuan. Sa Kanyang sakdal na buhay at mga turo, tayo’y napakalayo upang makaabot sa mga pamantayan ng Diyos. Nakinakita natin ang ating mga kasalanan kapalaluan, pagka-makasarili, at kubling mga motibo. Ipinakikita sa atin ni Jesus na kailangan natin ang kapatawaran at bagong buhay na iniaalok Niya sa atin.

Ipinakikita sa atin ni Jesus ang katangian ng Diyos at kung paano Niya matutugunan ang ating mga pangangailangan. Ibinabadya ni Jesus ang pag-ibig ng Diyos, pagpapahinuhod sa atin, at paghahanda ng paraan ng ating kaligtasan. Ipinakikita Niya kung paano natin tanggapin ang Diyos sa ating buhay at masyahang lagi sa kanyang liwanag.

**2 Corinto 4:6.** Ang Diyos na nagsabi, "Mula sa karimlan ay sisilang ang liwanag," ay siya ring nagbigay-liwanag sa aming mga isip upang makilala ang kadakilaan ng Diyos na nahahayag sa mukha ni Cristo.

**Hebreo 1:3.** Ang Anak ang maningning na sinag ng Diyos sapagkat kung ano ang Diyos ay gayon din ang Anak.

### Ang Gagawin Mo

9. Sabihin ang dalawang lugar na katatagpuan natin ng katotohanan tungkol sa ating sarili, sa Diyos at sa buhay.
  - a) .....
  - b) .....
10. Isaulo ang 2 Corinto 4:6.
11. Sa 2 Corinto 4:6, saan nagliliwanag ang kaningningan ng Diyos? .....
12. Saan pinasisikat ng Diyos ang kanyang ilaw upang mahatdan tayo ng liwanag ng kaalaman tungkol sa kadakilaan ng Diyos? .....
13. Sa Hebreo 1:3, anong ilaw ang taglay ni Jesus sa Kanyang pagliliwanag? .....
14. *Isipin mo:* Ibig mo bang mamasdan ang kaningningan ng Diyos sa mukha ni Jesu-Cristo?



### Ang Ilaw ay lakas

Ang ilaw ay maningning na lakas. Nadaragdagan ang natututuhan ng mga siyentipiko tungkol sa lakas na galing sa araw. Napakabisa nito at magagamit ng mga tao. Magagamit ito upang magpainit sa mga tahanan at magpaandar ng mga makinarya. Ngunit ang pinakamahalaga'y ang nagagawa nito sa buhay at kalusugan. Maraming halaman ang di tutubo sa lilim. Pinapatay ng sinag-araw ang maraming mikrobyo at nakatutulong sa ating kalusugan at kalakasan. Isipin mo kung walang araw sa ibabaw ng lupa. Walang init. Walang buhay. Walang lakas na magpapanatili rito sa pag-inog. Ang lupa ay magiging bolang ilado sa madilim na kalawakan, pabubusok sa kapahamakan.



Kung paanong ang araw ay mahalaga sa lupa, si Jesus na Araw ng Katuwiran ay ating kallangan. Naghahatid Siya ng buhay, init, kalusugan, lakas, at kapangyarihan, sa mga tumatanggap sa Kanya. Ang kanyang

kapangyarihan ang umaakay sa atin sa tamang landas. Pinagagaling Niya ang ating katawan at espiritu. Ang ilaw na nagbibigay-buhay na dulot ni Jesus ay malakas kaysa kamatayan. Gaya ng halamang umuusbong at sumasalubong sa sinag-araw; ang patay na sumunod kay Jesus ay babangon sa libingan, taglay ang bagong katawan at sasalubong sa Kanya kung bumalik na Siya rito sa lupa.

**Malakias 4:2.** Ngunit sa inyo na nangata-takot sa aking pangalan ay sisikat ang Araw

ng katuwiran na may kagalngan sa kanyang mga pakpak.

### Ang Gagawin Mo

15. Ano ang tawag kay Jesus sa Malakias 4:1? . . . . .
16. *Isipin mo:* Paano inihahambing ang taong wala kay Jesus sa lupang walang araw? May kakilala ka bang ganyan? Kung gayon, patulong ka sa Diyos para makilala niya si Jesus.

Ang ilaw ay para sa lahat, saanman. Kung paanong pagsikat ng araw sa burol at sa patag, sa mayaman at sa mahirap, sa matalino at sa mangmang; gayon nagliliwanag si Jesus sa buong sanlibutan, sa mabubuti at sa masasama. May nag-aakalang para sa kanilang bansa lamang ang Tagapagligtas. Ngunit nililinaw ng Diyos na ang Kanyang ilaw ng pagligtas ay para sa buong sanlibutan.

**Juan 1:9.** Ang tunay na ilaw, na tumatanglaw sa lahat ng tao, ay dumarating sa sanlibutan.



**Lucas 1:78,79.** Sapagka't lubhang mahabagin ang ating Diyos; magbubukang-liwayway sa atin ang araw ng kaligtasan upang magbigay-liwanag sa mga nasa kadiliman at nasa lilim ng kamatayan. At patnubayan tayo tungo sa daan ng kapayapaan.

Isang lalaking bulag ang nasa tabing-daan at namamalimos. Narinig niyang marami ang dumarating. Nalaman niya na daraan si Jesus, kasama ng karamihan. Nabalitaan na ng bulag na si Jesus ay nagpapagaling. Sumigaw siya, "Jesus, Anak ni David! Maawa ka sa akin!" Sinaway siya ng mga tao at pinatahimik. Hindi nila inakalang may panahon si Jesus na tumulongan ang pulubi. Ngunit may panahon nga si Jesus na tumulong sa sinumang napasasaklolo. Patuloy na tumawag ang bulag. Tumigil si Jesus, pinalapit ang pulubi. Ito'y pinagaling ni Jesus.



**Lucas 18:43.** Noon di'y nakakita siya at sumunod kay Jesus, at nagpasalamat sa Diyos.

Nagkaroon ng panibagong kahulugan ang buhay para sa pulubing nakakilala kay Jesus. Naging araw ang dating kadiliman. Hindi mahalaga kung ano ang nakaraan, na siya'y namamalimos at kumakapa sa dilim. Ngayon, siya'y lumalakad sa liwanag — hindi na bulag na pulubi kundi tagasunod ni Jesus, ang Ilaw ng sanlibutan!

### Ang Gagawin Mo

17. Sa Juan 8:12, sinasabing si Jesus ay naparito bilang  
 .... a) Ilaw para sa Kanyang bayan lamang  
 .... b) Araw ng katuwiran  
 .... k) Ilaw ng sanlibutan
18. Nang maganap ang Lucas 1:78-79, pinapangyari ng Diyos na magbukang-liwaway ang kaligtasan sa  
 .....  
 at mula sa langit ay liwanagan ang  
 ..... ng nasa  
 madilim na anino ng kamatayan.  
 Basahin uli ang Lucas 1:78-79 at ilagay sa puwang ang iyong pangalan.
19. *Isipin mo:* Paanong nabago ang buhay ng pulubi matapos tumawag kay Jesus ng ito'y masalubong? Paano babaguhin ni Jesus ang iyong buhay? May mga tao ba sa paligid mo na nangangailangan kay Jesus? Inilalapit mo ba sila sa kanya o hinahayaan lamang?

### Pagtugon sa Ilaw

#### Pagtanggi

May mga taong ayaw kay Jesus at tuma-tanggap tanggapin ang Kanyang Ilaw. Ibig nilang mamuhay ayon sa ibig nila. Ayaw nilang gawin ang ipinagagawa ni Jesus. Nang narito sa lupa si Jesus, may mga namuhi sa Kanya pagkat ang Kanyang turo ay nagpakitang sila'y mga makasalanan. Ibig nilang patayin ang ilaw, patayin si Jesus. Nilabanan nila

ang ebanghelyo. Ipinabatid ni Jesus sa kanila na Siya ang nagdala ng kaligtasan para sa bawat isa. Sinumang tatanggap sa Kanya ay maliligtas. Ngunit yaong tumatanggi sa kanyang ilaw ay humahatol sa kanilang sarili na mamuhay at mamatay sa kadiliman.

**Juan 3:19,20.** Hinatulan sila sapagkat napatito sa sanlibutan ang ilaw, ngunit inibig pa ng mga tao ang dilim kaysa liwanag, sapagkat masama ang kanilang mga gawa. Ang gumagawa ng masama ay ayaw sa ilaw, at hindi lumalapit dito upang hindi mahayag ang kanyang mga gawa.

### Ang Gagawin Mo

- 20 *Isipin Mo:* May kilala ka bang tumanggi kay Jesus? Bakit kaya? Ano ang mangyayari sa kanila? Magbago kaya sila ng isip kung makilala nilang higit si Jesus ito ba'y pagtangga? Mapanganib ba ito? Ano kaya ang nadarama ng Diyos pagkakita sa mga tumatanggi sa kaligtasang iniaalok. Niya sa pamamagitan ni Jesus?



## Pagtanggap

Ipinangako ni Jesus, "Sinumang sumusunod sa Akin ay magkakaroon ng ilaw ng buhay." Ito ang karanasan ng pagkakamit at patuloy na pagkakamit. Si Jesus ang ilaw. Ang magkamit sa Kanya ay may ilaw ng buhay at lahat ng biyayang kaugnay nito. Ang pagkakaroon ng ilaw ay higit sa pagkakamit ng kaalaman, kapangyarihan, at ng relihiyon. Higit ito kay-sa pagkabatid ng tungkol kay Jesus o sa Kanyang turo. Ito'y pag-aangkin kay Jesus bilang nagniningning, nagpapalakas, nakikitang lakas sa iyong buhay.



Ang sabi ni Jesus, "Sinumang sumusunod sa akin." Para makamtan ang ilaw ng Diyos, tayo'y sumunod kay Jesus, mamuhay sa Kanyang katotohanan. Nagpapahayag ang Diyos doon sa nakalaang tumanggap ng katotohanan at handang sumunod sa Kanya. Araw-araw, tayo'y pina-patnubayan Niya.

**1 Juan 1:7.** Ngunit kung namumuhay tayo sa liwanag, kung paanong siya'y nasa liwanag, tayoy' nagkakaisa at nililinis ng dugo ni Jesus na kanyang Anak sa lahat ng ating kasalanan.

**Kawikaan 4:18.** Ang landas ng matuwid ay parang maliyab na liwanag na sumisilang nang higit at higit sa sakdal na araw.

Ibig mo bang sumunod kay Jesus at magkaroon ng ilaw ng buhay? Tanggapin mo Siya sa bawat bahagi ng iyong buhay ngayon. Bayaan mong itaboy ng Kanyang maningning na pakikisama ang lahat ng kadiliman. Sundan ang Kanyang ilaw at ibahagi sa iba. Isuko mo sa Kanya ang iyong buhay upang mapuspos Niya ng Kanyang ilaw.

**Panalangin:** Jesus, pumasok ka sa buhay ko. Alisin mo ang kadiliman ng aking mga kasalanan at kinatatakutan. Baguhin mo ako ayon sa ibig Mo. Paningningin mo ako ng Iyong liwanag. Tukungan mong masunod Kita bawa't araw. Salamat sa Iyong ilaw.



### Ang Gagawin Mo

21. Isaulo ang 1 Juan 1:7. Ano ang ginagawa sa atin ng dugo ni Jesus kung namumuhay tayo sa liwanag?
22. Kung hindi mo pa tinatanggap si Jesus, gawin mo na ngayon. Magagamit mo ang panalangin narito o manalangin ka ng sarili mo. Kung tinanggap mo na Siya, pasalamatan Siya dahil sa Kanyang ilaw. Patulong sa Kanya na makalakad sa liwanag at patulong na maibahagi ito sa iba.

**Markahan ang iyong mga sagot.**

### Ika-6 na Aralin — Mga Sagot

Ang mga tanong sa araling ito'y nangangailangan ng 24 na sagot. Napakahusay ang antas ng 22 hanggang 24 na tama; 18 hanggang 21, mabuti; 13 hanggang 17 katamtaman. Kung wala pang 13 ang tama, basahing muli ang aralin.

1. b) Kawalan ng ilaw
2. k) Kasalanang naghiwalay sa tao mula sa Diyos.
3. Kadiliman: kamatayan, kasamaan, poot, kamalian.  
Ilaw: buhay, galak, mabuti, pag-ibig, katotohanan.
4. 1 Juan 1:5.
5. Jesus.
6. Ilaw ng buhay.
7. k) ang pananahanan ni Jesus sa buhay.
9. a) Ang Biblia; b) si Jesus
11. Sa mukha ni Cristo.
12. Sa ating puso.
13. Ang kaningningan ng Diyos.
15. Araw ng katuwiran.
17. k) Ilaw ng sanlibutan.
18. atin, lahat
21. Nililinis tayo sa lahat ng ating kasalanan.

Bilang ng mga tamang sagot . . . . . Antas . . . . .